



BOSNA I HERCEGOVINA – БОСНА И ХЕРЦЕГОВИНА - BOSNIA AND HERZEGOVINA  
FEDERACIJA BOSNE I HERCEGOVINE - ФЕДЕРАЦИЈА БОСНЕ И ХЕРЦЕГОВИНЕ -  
FEDERATION OF BOSNIA AND HERZEGOVINA

JAVNA USTANOVA CENTAR ZA EDUKACIJU SUDIJA I TUŽILACA  
JAVNA USTANOVA CENTAR ZA EDUKACIJU SUDACA I TUŽITELJA  
ЈАВНА УСТАНОВА ЦЕНТАР ЗА ЕДУКАЦИЈУ СУДИЈА И ТУЖИЛАЦА  
PUBLIC INSTITUTION CENTRE FOR JUDICIAL AND PROSECUTORIAL TRAINING OF FBiH



Broj:05-38-119-03/18

Sarajevo, 07. mart 2018. godine

**Na osnovu člana 8. Zakona o Centru za edukaciju sudija i tužilaca u Federaciji BiH („Službene novine FBiH”, br: 24/02, 40/02, 59/02 i 21/03), implementirajući Srednjoročnu strategiju za početnu obuku i stručno obučavanje (2017/2020 - Strateški pravac broj: 6 – Edukatori); Upravni odbor Centra za edukaciju sudija i tužilaca u Federaciji Bosne i Hercegovine, na sjednici održanoj dana 07. 03. 2018.godine, na prijedlog direktora Centra, donio je:**

## **PRAVILNIK**

### **o kategorijama, izboru, pravima i obavezama edukatora Centra za edukaciju sudija i tužilaca u Federaciji Bosne i Hercegovine**

#### **I OPŠTE ODREDBE**

##### **Član 1.**

Pravilnikom o kategorijama, izboru, pravima i obavezama edukatora (u daljem tekstu: Pravilnik), uređuju se pitanja koja se odnose na edukatore Centra za edukaciju sudija i tužilaca u Federaciji BiH (u daljem tekstu: Centar), kao što su: kategorije edukatora, kriteriji za izbor i imenovanje, prava i obaveze, postupak za izbor edukatora, ocjena rada, status i mandat, prestanak statusa, te druga pitanja koja se odnose na edukatore Centra.

#### **II EDUKATORI**

##### **Član 2.**

Program početne obuke i program stručnog usavršavanja Centra (u daljem tekstu: Program), provode sudije, tužioci i drugi edukatori Centra (u daljem tekstu: edukatori).

Listu edukatora usvaja Upravni odbor Centra, uz saglasnost Visokog sudskog i tužilačkog vijeća Bosne i Hercegovine (u daljem tekstu: Vijeće).

Izbor i imenovanje edukatora Centra, vrši se u skladu sa kriterijima utvrđenim ovim Pravilnikom.

### Član 3.

Edukatori Centra su i pravni i drugi stručnjaci za pojedine pravne i druge oblasti, profesori univerziteta, ovlaštena službena lica - eksperti za pojedine oblasti zaposleni u državnim organima i drugim organizacijama, agencijama za provođenje zakona i nevladinim organizacijama, kao i međunarodni eksperti iz određenih pravnih oblasti; procesnog i materijalnog prava i vještina.

Izbor i imenovanje edukatora iz stava 1. ovog člana, vrši se po postupku, kriterijima i na način propisan za izbor i imenovanje edukatora koji se biraju iz reda sudija i tužilaca.

Kriteriji i standardi koji se primjenjuju na izbor edukatora Centra shodno se primjenjuju i na angažovanje stranih eksperata i predavača u procesu obuke sudija i tužilaca.

### III KATEGORIJE EDUKATORA

#### Član 4.

Edukatori se svrstavaju u sljedeće kategorije: stalni edukatori sa liste edukatora i povremeni edukatori ili edukatori po pozivu.

### IV STALNI EDUKATORI SA LISTE EDUKATORA

#### Član 5.

Stalni edukatori su sudije, tužioc, profesori univerziteta, ovlaštena službena lica - eksperti za pojedine oblasti zaposleni u državnim organima i drugim organizacijama, agencijama za provođenje zakona i nevladinim organizacijama izabrani i imenovani putem Konkursa na Listi edukatora Centra.

Listu stalnih edukatora utvrđuje Upravni odbor Centra, a postaje konačna nakon što je odobri Vijeće.

Stalni edukatori imenuju se po proceduri i kriterijima utvrđenim ovim Pravilnikom.

Lista stalnih edukatora Centra objavljuje se na web stranici Centra.

Stalni edukatori sa Liste edukatora Centra imenuju se u skladu sa njihovim kvalifikacijama i ličnim interesovanjima i obavezuju se za realizaciju Programa u sljedećim pravnim oblastima:

1. krivičnopravna oblast,
2. građanskopravna oblast,
3. ustavnopravna oblast,
4. oblast upravnog prava,
5. oblast radnog i porodičnog prava,
6. oblast privrednog i finansijskog prava,
7. oblast prekršajnog prava,

8. oblast medijacije i arbitraže,
9. oblast Evropskog prava i prava Evropske unije,
10. Evropske konvencije o ljudskim pravima i osnovnim slobodama,
11. unapređenje vještina menadžment i metodologije podučavanja,
12. oblast komunikacije, komunikologije, psihologije i andragogije,
13. CMS/TCMS vještine i tehnologija; tehnologije on line učenja,
14. Strani jezici,
15. Druge oblasti materijalnog i procesnog prava i vještina

## V POVREMENI EDUKATORI

### Član 6.

Povremeni edukatori ili edukatori na poziv učestvuju u realizaciji Programa Centra u oblastima iz člana 5. ovog pravilnika, u kojima će njihova stručnost i iskustvo dati doprinos u realizaciji ciljeva Programa.

Kao povremeni edukatori mogu se angažovati i međunarodni stručnjaci i eksperti u određenoj oblasti u domenu saradnje Centra sa međunarodnim i nevladinim organizacijama pri realizaciji pojedinih edukativnih aktivnosti.

## VI KRITERIJI ZA IZBOR NA LISTU EDUKATORA CENTRA

### Član 7.

Kriterijima za izbor edukatora treba osigurati najviše standarde pravosudne obuke.

Kriteriji za izbor edukatora su transparentni.

U procesu javnog oglašavanja izbora i imenovanja edukatora Centra, kriteriji obuhvataju sljedeće standarde:

- Prethodno radno iskustvo i rezultati u području prava za koje se vrši izbor edukatora;
- Ocjena prethodnog rada kao edukatora Centra i iskustvo u edukaciji generalno;
- Naučno zvanje (magisterij, doktorat);
- Stručni, naučni radovi, te učešće na konferencijama u relevantnoj oblasti;
- Uspješno završena stručna obuka za edukatore organizovana u BiH ili inozemstvu.

VII IZBOR I VREDNOVANJE EDUKATORA  
KOMISIJA ZA PROVOĐENJE POSTUPKA IZBORA EDUKATORA

Član 8.

Upravni odbor Centra imenuje tročlanu Komisiju za provođenje postupka izbora edukatora (u daljem tekstu: komisija).

Komisiju iz stava 1. ovog člana sačinjavaju: predstavnik Centra, jedna sudija i jedan tužilac, članovi Upravnog odbora.

Upravni odbor Centra utvrđuje Listu edukatora Centra na osnovu prijedloga Komisije.

VIII POSTUPAK PROVOĐENJA KONKURSA

Član 9

Izbor i imenovanje edukatora Centra vršiće se putem konkursa.

Centar objavljuje konkurs na svojoj web stranici, kao i u jednom štampanom dnevnom glasilu koji se distribuira na teritoriji Bosne i Hercegovine.

Konkurs traje 30 dana od dana objavljivanja u dnevnom glasilu.

Na konkurs mogu se prijaviti lica koja ispunjavaju uslove za vršenje sudijske i tužilačke funkcije u skladu sa Zakonom o Vijeću, kao i ostala lica iz člana 3 ovog pravilnika.

Član 10.

Pri utvrđivanju liste kandidata za izbor edukatora Centra, Komisija vrednuje sljedeće parametre:

- a) Prethodno radno iskustvo i rezultati u području prava za koje se vrši izbor edukatora-30 bodova,
- b) ocjena prethodnog rada kao edukatora Centra i iskustvo u edukaciji generalno-25 bodova,
- c) naučno zvanje (magisterij, doktorat) do 20 bodova,
- d) objavljeni naučni te stručni radovi te učešće na konferencijama u relevantnoj oblasti-15 bodova,
- e) uspješno završena stručna obuka za edukatore organizovana u BiH ili inozemstvu-10 bodova.

## Član 11.

Kandidati koji nemaju završenu stručnu obuku za edukatore, imaju obavezu pohađanja edukacija edukatora u organizaciji Centra, prije preuzimanja dužnosti edukatora i realizacije edukativnih aktivnosti.

Kandidati koji su vrednovani sa 50 i više procenata od maksimalno mogućeg broja bodova, utvrđuju se kao kandidati za imenovanje edukatora Centra.

Komisija utvrđuje prijedlog Liste edukatora Centra i dostavlja Upravnom odobru Centra na usvajanje.

## Član 12.

Komisija iz člana 8. ovog Pravilnika u roku od 15 dana od dana okončanja procedura izbora, o rezultatima konkursa pismeno obavještava učesnike konkursa.

## Član 13.

Upravni odbor Centra na osnovu provedenog konkursa, sačinjava jedinstvenu Listu edukatora Centra i tu listu dostavlja Vijeću na davanje saglasnosti.

## IX OCJENA RADA EDUKATORA

### Član 14.

Ocjena rada edukatora zasniva se na slijedećim parametrima:

- doprinos edukatora definisanju strateškog plana obuke i stručnog usavršavanja;
- podrška data pri izradi godišnjeg Programa;
- priprema obuke i stručnog usavršavanja (kalendar seminara, kontakti i koordinacija sa predavačima, identifikacija ciljeva i metodologija obuke, prikupljanje materijala isl);
- doprinos u pripremi i sprovođenju odgovarajuće metodologije obuke i stručnog usavršavanja;
- učešće u procedurama analize potreba za obukom;
- rad edukatora u svojstvu koordinatora, moderatora ili predavača na konkretnim obukama;
- ocjena obuke, odnosno, stručnog usavršavanja.

Ocjenu izložene prezentacije edukatora vrše učesnici obuke upitnikom o evaluaciji koji je anonimn.

## Član 15.

Eduktor podnosi Centru pismeni izvještaj radi ocjene učinka izvršene obuke, te zaključke učesnika seminara radi planiranja buduće obuke.

## X TESTIRANJE EFEKATA OBUKE I STRUCNOG USAVRŠAVANJA

### Član 16.

Analiza i izvještaj sa obuke sadrže ocjene o obuci, odnosno stručnom usavršavanju, pripremaju se i popunjavaju na kraju obuke.

Analiza i izvještaj uključuju ocjene i/ili opservacije koje se odnose na učinak edukatora u pogledu pripremljenosti programa/dnevnog reda, kvaliteta ponudjenog materijala, metodologije koja se koristila, komunikacijskih vještina edukatora, eksperata, relevantnosti odabrane teme i dr.

### Član 17.

Rad edukatora mora biti kolegijalan što podrazumijeva da predavanja moraju kombinovati različite potrebe, koordinirati različite ideje, jedni od drugih primati savjete u vezi sa iskustvima, graditi sinergiju među ekspertima, polaznicima, te stručnim i administrativnim osobljem Centra.

## XI MANDAT EDUKATORA

### Član 18.

Eduktori Centra imenuju se na period od 4 (četiri) godine.

Po isteku mandata raspisuje se novi konkurs.

Izuzetno, Upravni odbor Centra može i nakon proteka dvije godine raspisati dodatni konkurs, radi obezbjeđenja prijave novih edukatora.

## XII PRESTANAK STATUSA EDUKATORA

### Član 19.

Eduktori koji u toku mandata edukatora ne izvršavaju preuzete obaveze ili koji za svoj rad ne dobiju pozitivnu ocjenu, odlukom Upravnog odbora Centra biće brisani sa Liste edukatora, o čemu će se obavijestiti Vijeće.

Kršenje Kodeksa i standarda sudijske i tužilačke etike utvrđene u konačnoj odluci Vijeća, razlog je za prestanak statusa edukatora Centra.

### Član 20

Centar obezbjeđuje uslove za nesmetan rad i obavljanje dužnosti edukatora u skladu sa ovim Pravilnikom, vodeći računa o ranijem angažovanju edukatora u skladu sa programom edukacije za tekuću godinu.

Centar obezbjeđuje tehničku podršku, organizaciju i uslove za održavanje obuke, odnosno, stručnog usavršavanja sudija i tužilaca.

Praćenje rada seminara na nivou standarda pravne struke, Centar obezbjeđuje učesćem stručnih lica zaposlenih u Centru koji pomažu edukatoru/ekspertu u vršenju njihovih dužnosti, sačinjavaju stručne analize i izvještaje o obuci, odnosno, seminaru i iste dostavljaju službi analize realizacije programa stručnog usavršavanja sudija i tužilaca.

#### Član 21.

Centar obezbjeđuje da se mišljenja i preporuke date u toku realizacije programa Centra, a koje se odnose na zakone i druge propise, dostave nadležnim ministarstvima pravde, drugim nadležnim organima i Vijeću.

### XIII PRAVA I OBAVEZE EDUKATORA

#### 1. PRAVO NA TROŠKOVE EDUKACIJE

#### Član 22.

Za vrijeme učestvovanja u realizaciji Programa koju provodi Centar, stalni i povremeni edukatori imaju pravo na:

-naknadu neophodnih i opravdanih troškova nastalih tokom priprema za vršenje poslova edukatora (izrada stručnih materijala, Power Point prezentacija, korespodencije i sl.), uz priloženi račun,

- nadoknadu za vršenje funkcije edukatora po jednom danu, u realizaciji konkretnih programa Centra, do visine iznosa jedne polovine neto prosječne plate, isplaćene u Federaciji BiH u prethodna tri mjeseca.

## 2. KRITERIJI ZA ISPLATU NAKNADE ZA VRŠENJE FUNKCIJE EDUKATORA

### Član 23.

U skladu sa članom 22. Pravilnika, o isplati naknade za vršenje funkcije edukatora u svakom pojedinačnom slučaju odlučuje direktor Centra.

Direktor Centra će prilikom odlučivanja o isplati naknade, pored ograničenja iz člana 22. alineja 2, uzeti u obzir i finansijske mogućnosti Centra.

### Član 24.

Troškove iz člana 22. nadoknađuje Centar po obavljenom poslu, nakon što edukator podnese obračun uz odgovarajuću dokumentaciju na propisanom obrazcu u skladu sa ovim Pravilnikom.

## 3. TROŠKOVI PREVOZA

### Član 25.

Pod troškovima prevoza podrazumijevaju se troškovi nastali od redovnog mjesta rada edukatora do mjesta gdje se treba obaviti određena edukativna aktivnost po nalogu Centra.

### Član 26.

Prevoz se može izvršiti svim javnim prevoznim sredstvima, a izuzetno taksijem i vlastitim automobilom pod uslovima propisanim ovim Pravilnikom.

### Član 27.

Ostala prevozna sredstva kao i avion, mogu se koristiti po odobrenju direktora Centra.

## 4. NAKNADA ZA ISHRANU I SMJEŠTAJ

### Član 28.

Naknada za ishranu i smještaj edukatoru pripada u skladu sa Zakonom o plaćama i naknadama u organima vlasti u Federaciji BiH („Službene novine Federacije BiH”, broj: 45/10) i pratećim podzakonskim aktima.

## 5. OSTALI TROŠKOVI

### Član 29.

Troškovi koji nastaju tokom pripreme i vršenja edukacije priznaju se edukatoru u skladu sa prezentovanim računima (telefonski razgovori, poštanske pošiljke, troškovi umnožavanja, izrada slajdova i slično, utrošeni kancelarijski materijal ), s tim što se iznos računa uvećava za paušal od 20%



Za troškove iz stava 1. ovog člana potrebno je podnijeti račune, odnosno učiniti troškove vjerovatnim, ako iz bilo kojih razloga račun nije bilo moguće pribaviti.

#### XIV REVIZIJA OBRAČUNA ISPLATA

##### Član 30.

Šef Odsjeka za finansijske poslove vrši reviziju obračuna i isplate naknada po ovom Pravilniku, te pregleda svu dokumentaciju i evidenciju koja se sastavlja po odredbama ovog Pravilnika.

##### Član 31.

Pregled i revizija iz člana 30. obavljaju se bez prethodnog pismenog naloga direktora najmanje jedanput godišnje.

#### XV OSLOBADANJE EDUKATORA - SUDIJA I TUŽILACA OD REDOVNIH OBAVEZA

##### Član 32.

Sudije i tužioci sa statusom edukatora koji su angažovani u realizaciji Programa, u toku godine biće oslobođeni od svojih redovnih obaveza u sudu, odnosno tužilaštvu srazmjerno obavezama u učešću na dužnostima edukatora, te se njihovo odsustvo smatra službenim putovanjem.

#### XVI EVIDENCIJE I OBAVJEŠTAVANJE O OCJENAMA

##### Član 33.

Centar će usvojiti evidenciju o vrednovanju edukatora u edukaciji koja će sadržavati podatke iz člana 16. ovog pravilnika i o tome će obavještavati Vijeće.

#### XVII OBAVEZE EDUKATORA

##### Član 34.

Edukatori sa Liste Centra imaju sljedeće obaveze:

- ukoliko su po prvi put edukatori Centra prođu prethodnu edukaciju edukatora u oblasti metodologije i vještina i pripreme obuke;
- da preuzmu odgovornost i obavezu izvođenja početne obuke, odnosno stručnog usavršavanja iz relevantne pravne oblasti u skladu sa Programom Centra;
- da pripreme i Centru dostave najkasnije 15 dana prije održavanja seminara pismeno obradenu temu koja je predmet edukacije;

- da učestvuju u pripremi, kreiranju i sastavljanju dnevnog reda konkretnih seminara ili drugih oblika obuke, odnosno stručnog usavršavanja, 15 dana prije održavanja seminara;
- da neposredno realizuju programe seminara, odnosno drugog oblika obuke i stručnog usavršavanja, da učestvuju u seminarima za edukaciju edukatora;
- da podnose izvještaje o evaluaciji svakog konkretnog seminara sa zaključcima seminara, odmah ili najkasnije u roku od 8 dana od završetka seminara;
- podnose obračune troškova edukacije uz prilaganje originalnih dokaza i dokumenata, odmah ili najkasnije 8 dana od završetka seminara.

#### Član 35.

Edukatori sa Liste Centra dužni su učestvovati u pripremi godišnjeg Programa Centra i izradi procedura za obavljanje procjene potrebe za obukom i stručnim usavršavanjem.

#### Član 36.

Edukatori Centra su dužni da preuzete obaveze obavljaju u skladu sa najvišim standardima pravosudne obuke i stručnog usavršavanja i uz poštivanje etičkih kodeksa i standarda u pravosudnom sistemu u Bosni i Hercegovini.

### XVIII PRELAZNE I ZAVRŠNE ODREDBE

#### Član 37.

Ovaj Pravilnik stupa na snagu danom potvrđivanja od strane Vijeća.

Stupanjem na snagu ovog Pravilnika, prestaje da važi Pravilnik o kategorijama, izboru, pravima i obavezama edukatora Centra za edukaciju sudjja i tužilaca u Federaciji BiH: 05-38-551-05/13 od 04.07.2013. godine i Pravilnik o izmjenama i dopunama Pravilnika o kategorijama, izboru, pravima i obavezama edukatora Centra za edukaciju sudjja i tužilaca u Federaciji BiH: 05-38-943-03/13 od 19.12.2013. godine.

